

MEJE PO CARTE JUDAS TATINA POMONAETHA POMONAE JESUS PIA PEJUME COWŪNTSIWICHI

Meje poxonae Judas tamropata pitaba xua tatina pomonaetha pomonae bayatha Nacom waba xua pia pejume cowŭntsinexatsi

¹Xan, Judas, ponxaein tanacuitan amanaya Jesucristo tacoya taichichipaexae. Xan Santiago peweicho tatsin. Barapo carte pacata tinatsi pomonae pam, pomonae bayatha Nacom Waxa itapetsiya paca waba, xua painya nejume cowŭntsinexa. Nacom bichocono paca antobe. Nacom Pexanto tatsi pon Jesucristo beta paca yapu eena xua beta painya nejume cowŭntsinexa Nacom. ²Barabŭ Nacom jopa juniya paca yabara nanta xeinae tsane xua nantanuweya paca yabara nanta xeineibina pia paca cayawenaenexa. Matautano barabŭ Nacom bichocono jŭntema jinompa paca exanaena. Matautano barabŭ Nacom paca catsibina pia peantobe coyenewa painya neyawa muxuna jinompaenexa.

Meje yabara xua pomonae pemuxujainyabiya cuidubi jiwi

³Paxam pomonae bichocono tapaca caantobewichi pam. Maisa bichocono ichichipan xua yabara tapacata tinaewatsi pecapanenebiyae coyenewa xua po coyenewatha Nacom paca capanepa abe painya neexanae cuiru coyenein weya. Barapo coyenewatha Nacom necapaneparŭ barapo coyene weya. Bequein ichichipan yabara pacata tinatsi baxua, daichitha anoxuae jopa neitacŭpaeyo. Jame bewa copiya yabara pacata tinaeinchi xua painya nejume cowŭntsiwa. Paca itorobatsi xua naitomatsiya jume daunweya yabara painya paebinexa painya nejume cowŭntsiwa, bequein ichamonae paca atene exana painya nejume cowŭntsixae Jesús. Barapo pejume cowŭntsiwa Nacom caena bayatha caetotha nacui coyene cata pijimonae, xua barapomonae xuya penacui coyene cacataponaenexa ichamonaetha.

⁴Bara barapocotsiwa paca tsipaebatsi, tsipei jiwi namichiya jinompa painya xantha pomonae pemuxujainyabiya cuidubi jiwi xua jopa pacui yaputaem pocotsiwa barapomonae exana. Caena bayatha barapomonae Nacom Pejume Diwesitha yabara tinatsi xua barapomonae pinae bewa atene tsane abe peexanaexae. Barapomonae peajuntucoyenebe jiwi. Matautano barapomonae jiwi muxujainyabiya cuidubatsi xua pinae Nacom amanayiya capanepa jiwi pia peantobexae. Nacom peantobexae jiwi, daxota pinae Nacom copata xua jiwi bara abe peexanaenexa. Barapomonae yabara jume itaweta, poxonae po jumetha ba jiwi jeye: “Jesucristo, bapon yatsicaya compa pon Wanacaitorobin xvano Wanacanamataxeinaein”, jei.

⁵Bequein payaputaneme xua bayatha Nacom, pon jiwi Pecanamataxeinaein exana, daichitha ichichipan xua equeicha yabara tapaca tsipaewatsi baxuan. Nacom exana xua piamonae tatsi Egipto nacua wepanenebiya xua Israel nacua bepanenebiya. Bequein Nacom baxua cana exana daichitha pirapaeyo Nacom cana exana xua barapo israelmonae jiwamonae jutebatsi pomonae jopa pejume cowuntsiwixaetsi. ⁶Matautano payaputaneme xua Nacom cana exana matatsunpiwitha. Barapo matatsunpiwi nacui barapenta pia peitorobi coyenewan bequein Nacom cata. Matautano barapomonae Nacom pia nacua weya tatsi pona xua nacou tomara cuenta warapa xua itaboco weyaxae. Daxota Nacom itoroba xua barapo matatsunpiwi peyamaxu cubiya jebinxatsi pequirei nacuatha beya, beya abu poxonae po matakabi tsane poxonae atene tsane poxonae Nacom yabara paebina daxita jiwi xua penatsicuentiwa xua abe peexanaexae. Barapo matatsunpiwi penaintontha maxu cubebatsi, po penainton jopa weraweracaeyo. ⁷Pacayabara nanta xeinare xua poxonae po tomarabeta Nacom cana exana, po tomara pewun Sodoma yawa xua Gomorra, yawano xua poxonae ichaxota po tomarantha xua cuariyatha ena. Barapo tomaranpiwi abe exana xua poxonae cana siwainyameinta exana pebiwitha xua jopa be ichiyo xua pocotsi coyenewatha ba pebiwi cana exana yabuxitha. Nacom caunutsiya yabara paeba barapomonae xua barapomonae ataya tsitecaeya peraxa exainchi abe peexanaexae. Barapomonae naca tsita itapeinya xeina xua Nacom bara cana ichi tsane daxita jiwitha icha barapo tomarabepiwi cana ichichi.

⁸Ichitha pomonae anoxuae yabara paca tsipaebatsi, pomonae pemuxujainyabiya cuidubi jiwi, barapomonae abeya nanta xeina dubenanaebiya, xua poxonae baxua yabara amachinae tsurubenanaebiya. Daxota barapomonae pia pepon abeya taxoba exana dubenanaebiya. Barapomonae itaweta Nacom pia peitorobi coyenewa pon jiwi Pecanamataxeinaein. Matautano barapomonae abe yabara paeba Nacom pia matatsunpiwi. ⁹Nacom pia matatsunpin, po matatsunpin

matacapana icha matatsunpiwi, bapon pewun Miguel. Bapon Miguel najume matsontsonobabe caurimonae pia pentacaponaein tatsi. Yabara najume matsontsonobabe xua Moisés pia pepon xua jintam metha pinae xeinaena. Miguel jopa nanta xeinaeyo xua xuya anaepanaya jume nota xua pejeiwa: “Maisa abe exaname daxota Nacom pon jiwi Pecanamataxeinaein atene cacana exanaena”, jopa jeyo, bara bequein itacupatsi xua pepaebiwa baxua. Saya jame Miguel jei: “Barabu Nacom caitawetsina”, jei Miguel. ¹⁰Ichitha barapomonae pomonae pemuxujainyabiya cuidubi jiwi abe yabara paeba pocotsiwa barapomonae jopa yaputaeyo. Matautano barapomonae exana icha be pocotsi coyeneya ichichipa xua abe peexanaewa. Barapomonae baxua exana bequein jopa pexanepanayeyo taetha, icha duweimonae ichi xua poxonae exana be pocotsi coyeneya ichichipa. Daxota barapomonae pia coutha naajuntucoyenebe cana exana.

¹¹ ¡Jaibo, barapomonae tsobenae! Tsipei barapomonae Nacom jopa bejume cowuntichi icha be ichi pon pewun Caín, pon caena bayatha peweicho bexuba, peweicho peuwixae. Matautano barapomonae catsibatsi paratixi xua ichamonae catsiba xua barapomonae abeya coyeneya pecuidubixae. Tsipei barapomonae bichocono pitaparatixichi icha be poxonae ichi pon pewun Balaam poxonae paratixi catsibatsi xua ichamonae catsiba xua Balaam abeya coyeneya pecuidubixae. Matautano barapomonae jiwi juntu coyene tsacabatsi xua jiwi naba peexanaenexa Nacomtha daxota barapomonae werapaena. Baxua exana icha be poxonae pon pewun Coré ichi poxonae jiwi juntu coyene tsacabatsi xua jiwi naba peexanaenexa Moisestha, xua bapoxonae Coré tupa xua bexotsi. ¹²Poxonae paxam paexaname xua jiwi nacaetuta painya nenabanaenexa painya nenaantobexaem, barapomonae pomonae pemuxujainyabiya cuidubi jiwi paca caxinta pia peexanae coyeneintha. Barapomonae atsaquiya nabane, yawa atsaquiya apa. Saya jopa yabara nanta xeinaeyo ichamonae. Saya meisa barapomonae nayabara nanta xeina nawita. Poxonae barapo coyene exana, barapomonae abe paca cana exana. Po tsaquinaebowan ba xua jopa jiwi catichi mera, xua equeicha pin joibo tabu torota peira tsewi weya xua jopa peruneicaenexa tsane, barapo tsaquinaebowan ba jiwi jopa catichi mera, jiwi jopa yawenaetsi. Bara juta ichi barapomonae pomonae pemuxujainyabiya cuidubi jiwi. Bequein barapomonae pia coutha beta nayabara paeba, daichitha jiwi jopa yawenaetsi. Po naein ba xua jopa nacoichiyo pia matababintha xua poxonae nacoiteiba barapo naein jiwi ba yatabaca jona tsipei jopa naein penacoichixae. Bara juta ichi barapomonae pomonae pemuxujainyabiya cuidubi jiwi, jiwi jopa beta xapain jinompa cana exanaetsi. Daxota jiwi itaweta barapomonae. ¹³Ichamonae aura exanatsi poxonae barapomonae abeya cuiduba xua jopa jiwi peyawenaexaetsi.

Barapomonaē bichocono abe exana icha pin maratsaca doriton ichi xua pitapa beya bebeya xua thamthamei xua bichocono petsoreixae. Bara jūta ichi barapomonaē saya jiwi aura exanatsi abe peexanaexae daxota jiwi cuenta pona barapomonaē. Poxonaē opiteiton ba poton pia namton weya itaxanumeinyatsi saya pipato dubenanaebiya ataya ichaxota pequireiwatha. Bara jūta ichi barapo pemuxujainyabiya cuidubi jiwi, jopa xapain jinompaeyo po cae pin nacuathe. Daxota Nacom bebai tsane barapomonaē pia xainya weya ichaxota pequireiwatha xua bara ataya tsitecaeya tsane abe peexanaexae.

¹⁴Barapomonaē pomonaē pemuxujainyabiya cuidubi jiwi yabara paebatsi, xua ichun yabara paeba pon pewun Enoc. Adán xeina seis poyobe pia pemomo susatopiwi xua napuna naexanapona beya poxonaē bapon naexana pon Enoc. Bapon Enoc pon caena bayatha Nacom pia nacia beicha caichatsi. Bapon Enoc yabara paeba barapomonaē pomonaē pemuxujainyabiya cuidubi jiwi, poxonaē cueicueijei pocotsiwa Nacom yaputane exana. Bapon Enoc jeye: “Tan pon jiwi Pecanamataxeinaein. Bapon tan xua pia matatsunpiwi baru patopeica, bichocono pin bicheito matatsunpiwi. ¹⁵Bapon baru patopeica matatsunpiwi xua jiwi atene peexanaewa tsainchi. Bapon yabara paebina daxita jiwi xua penatsicuentsiwa xua abe peexanaexae. Matautano bapon yabara paebina xua pocotsiwa bapomonaē abe exana Nacomtha. Matautano bapon yabara paebina pocotsiwa barapomonaē Nacom abe peyabara paebiwatsi”, jei Enoc. ¹⁶Barapomonaē pomonaē pemuxujainyabiya cuidubi jiwi ichawa beya daxita coyeneintha abeya yabara paeba. Xua daxita coyenein petsita aitacoyenebexaetsi daxota barapomonaē jopa juntu coyene weiweinaya jinompaeyo. Matautano meisa yabara nanta xeina xua piawan meisa penata exanaewan. Barapomonaē peatsacae jiwi bichocono. Bara bequein barapomonaē beta paeba ichamonaetha, saya poxoru xua peyabara muxujainyabinexa xua ichamonaē peyabara muxujainyabinexatsi pocotsiwa xeina.

**Meje yabara xua Judas muxuweta pomonaetha pomonaē pejume
cowuntsiwi xua pejume cowuntsiyainwa pemuxuitorobi diwesi**

¹⁷Equeicha paca tsipaebatsi pomonaē bichocono tapaca caantobewichi pam. Paxam bewa payabara jūtanainaem pocotsiwa bayatha paeba pomonaē Jesucristo pon jiwi Pecanamataxeinaein pia peitorobi jiwi tatsi. ¹⁸Barapomonaē paca jeye: “Pewunaeya tsane poxonaē po dapaetha Nacom yabara paebina jiwi xua penatsicuentsiwa xua abe peexanaexae copiya patsina pomonaē cui caponaena, pocotsiwa Nacom piawa tatsi baxua cui caponaeinchi. Matautano barapomonaē ichichipaeya exana dubenanaebiyaena icha be pocotsi coyeneya ichichipa xua abe peexanaewa”, jei barapomonaē pomonaē Jesús pia peitorobi jiwi tatsi.

¹⁹Pocotsimonae baxua exana xua abe exana, bapocotsimonae tsaba exana piamonaetha xua barapo bicheitobe nacasebabe. Barapomonae pomonae abe peexanaewi exana xua pocotsiwan ichichipa peexanaewa. Barapomonae jopa exanaeyo pocotsiwa Nacom ichichipa, tsipei jopa yawa jinompaeyo Nacom pia Pejumoŋe t̄nax̄u tatsi.

²⁰Ichitha nama paxam pomonae bichocono tapaca caantobewichi pam. Bayatha painya nejume cow̄untsixaem Nacom, daxota awiya pana naj̄unt̄u coyene tsacabare. Awiya mataropeichiya painya nejume cocow̄unt̄aponaenexa po pejume cow̄untsi coyeneya Nacom weya pona. Nacom pia Pejumoŋe t̄nax̄u tatsi pia peayapus̄watha tatsi paw̄ucare Nacom. ²¹Beta payaj̄unt̄u coyeneya jinompare Nacom pia peantobe coyenewa tatsi. Paw̄nae eware po matacabitha poxonae Jesucristo Wanacanamataxeinaein naca catsina peaj̄unt̄uyapus̄wa, po peaj̄unt̄uyapus̄wa ataya tsiteca. Baxua naca catsina tsipei Nacom nantanuweya naca yabara nanta xeina pia wanaca yawenaenexa tsane.

²²Ichamonae pomonae yabara ainya muxu pexeinaewi pemuxujainyabi diwesi barapomonae payabara nantanuweya yawende painya neantobexae xua jopa pejume cow̄untsinexa barapo pemuxujainyabi diwesi. ²³Ichamonae muxu pejume cow̄untsi barapo pemuxujainyabi diwesi. Nainya payawende barapomonae painya neantobexae xua Nacom pecapanenebiyaenexa bapo abe peexanae cuiru coyene weya pejume cow̄untsixae tsane Nacomtha. Panantanuweya yabara nanta xeinde ichamonae, painya neyawenaenexa tsane painya neantobexae xua ir̄u pejume cow̄untsinexa tsane Nacom. Ichitha dota pam xua abe painya neexanaeyainwa icha poxonae xua barapomonae ichi xua poxonae abe exana.

Meje yabara xua Judas najume wetsiya w̄nae jainta Nacom

²⁴⁻²⁵Anoxuae nama yabara paca tsipaebatsi Nacom pon pepa Nacom pon nacata compa. Bapon bichocono peyaputaein. Barapon Nacom Wanacacapanenebiyaein. Barapon pia peayapus̄u itorobiya coyenewatha paca yapu eenaena xua jopa abe painya neexanaewa tsane. Matauta Nacom paca cana exanaena xua j̄unt̄u coyene xanepanaeya painya neumenaenexa tsane bapon peitabaratha tatsi. Matautano bapon paca cana exanaena xua bichocono painya nej̄unt̄u coyene weiweinaya neumenaenexa tsane bapon pia pexeinya peit̄panae coicha itabaratha tatsi. Barapon Nacom waxainchi w̄nae jaintatsi Jesucristo pon Wanacanamataxeinaein pet̄paexae. Waxainchi jeichichi Nacomtha: “Barab̄u ataya tsitecaeya xeinaeya poponaename jinya pexeinya it̄panae coicha yawa jinya neainya cui coyenewa. Matautano barab̄u ataya xeinaeya poponaename jinya neayapus̄u itorobi coyenewa, xuano xua jinya neayapus̄u exanae coyenewa. Daxita baxuan caena bayatha

xeiname poxonae aena, xuano xua anoxuaeno xeiname yawano xua bexa
tsane bara ataya xeinaename”, jeichichi Nacomtha. Je, bara ichi tsane.

Baja Judas.